

依此法身得度二種障故。一者有煩惱闇障。二者空無善根障。得度煩惱闇障者。如盲得眼。相似法故。如經。如闇遇明故。得度空無善根障者。滿足財寶。相似法故。如經。貧人得寶故。

次科二種障者。一切眾生。在生死中。具足煩惱。盲無所見。失諸善根。貧無福慧。唯此木叉。能破二障。一能破惡。二能成善。斷惡則業惑俱喪。成善則定慧由生。對合經文。了然可見。

△<sup>癸三</sup>示利益。

餘者。示現波羅提木叉。是修行大師故。如經。當知此則是汝大師故。又示住持。利益人法相似故。如經。若我住世。無異此也故。

三中餘者。指盡後文。又為二段。初釋師義。師有多別。佛為開法救世大師。和尚。闍梨。受業。教授。悉得名師。今此木叉。軌範群生。依承得度。故彰別號。謂之修行大師。又下次釋。人法相似。人即是佛。法即木叉。以佛在世。專用木叉。軌物安眾。佛雖云滅。此法常存。但使稟承。何殊佛在。方見木叉。住持之益。嗟今道眾。撥棄戒科。謂言通達。無師無法。沉墜何疑。請詳此文。庶幾一悟。

△<sup>庚二</sup>方便遠離戒三。<sup>辛一</sup>標章。<sup>辛二</sup>舉經。<sup>辛三</sup>釋義。

今初

依根本清淨戒已說。次說方便遠離清淨戒。

△<sup>辛二</sup>舉經。

經曰。持淨戒者。不得販賣貿易。安置田宅。畜養人民。奴婢。畜生。一切種植。及諸財寶。皆當遠離。如避火坑。不得斬伐草木。墾土掘地。合和湯藥。占相吉凶。仰觀星宿。推步盈虛。歷數算計。皆所不應。節身時食。清淨自活。不得參預世事。通致使命。咒術仙藥。結好貴人。親厚媿慢。皆不應作。當自端心。正念求度。不得包藏瑕疵。顯異惑眾。於四供養。知量知足。趣得供事。不應畜積。

△<sup>辛三</sup>釋義二。<sup>壬一</sup>釋總標。<sup>壬二</sup>釋別相。

今初

論曰。此中方便遠離淨戒者。護根本淨戒故。如經。持淨戒者故。

二方便戒釋義中。初文護根本者。護謂能護。即此方便戒。對經持字。根本是所護。即前木叉體。對經淨戒字。

△<sup>壬三</sup>釋別相二。<sup>癸一</sup>雙徵。<sup>癸二</sup>別釋。

今初

云何護根本。何者是根本。

別相中。雙徵能護所護之相。發起廣文。

△<sup>癸二</sup>別釋<sup>二</sup>子<sup>一</sup>明護根本戒<sup>子二</sup>是根本戒。初中<sup>二</sup>子<sup>一</sup>總分<sup>丑二</sup>別釋。今初

護根本戒者。今說二種。何等為二。一者不同凡夫增過護。二者不同外道損智護。

初。總分二護。凡夫營塵俗事。故多增過。非不損智。外道起分別見。則多損智。非不增過。今並遠離。故皆云不同也。然遮戒無量。且舉喜犯。略示數條。禁微防著。故云護也。

△<sup>丑二</sup>別釋<sup>二</sup>寅<sup>一</sup>不同凡夫增過護<sup>寅二</sup>不同外道損智護。初中<sup>二</sup>卯<sup>一</sup>通舉<sup>卯二</sup>牒釋。今初

不同凡夫增過護者。有十事。(註二)。

△<sup>卯二</sup>牒釋<sup>二</sup>辰<sup>一</sup>別釋<sup>十</sup>文<sup>如辰二</sup>釋喻。今初

一者方便求利增過。如經。不得販故。二者現前求利增過。如經。不得賣故。三者交易求利增過。如經。不得貿易故。若依世價。無求利心。不犯。賣買法式。如毗尼中廣說。四者所居業處。求多安穩增過。如經。不得安置田宅故。五者眷屬增過。如經。不得畜養人民故。此示外眷屬。非同意者。何故不但言人。而復說民者。以其同在人中。於善法不了。畜之生漏故。(註三)。六者難生卑下心增過。如經。不得畜奴婢故。七者養生求利增過。如經。不得畜畜生故。八者多事

增過。如經。不得一切種植故。九者積聚增過。如經。及諸財寶故。十者不順威儀及損眾生增過。如經。不得斬伐草木。墾土掘地故。

初中別釋有十。初云方便求利者。戒疏云。為利故收。為利故出。爭價而高。為販是也。經中不得二字。貫下十過。二現前求利者。戒疏云。為利而取故。減前價名買。為利故出。強增其價是賣。經不明買。義攝其中。如下所指。三交易求利者。謂以物相博。準律捨墮中。以寶相易。或以物易寶。則犯買賣。若以衣物相易。或以寶買衣。則犯販賣。經舉貿易。通含二戒。若依下。明開。買賣永制。販賣容開。律不犯中。聽五眾出家人交貿。應自審定。不應共相高下。如市道法。若非五眾。令淨人貿。又五分云。使人易時。應作念云。寧使彼得我利。我不得彼利等。皆無犯也。賣買下指廣。經中說律。名隨經之律。律內說經。名隨律之經。止可略提。不宜廣涉。故此互指。述作明規。章記之家。多不知此。學律者通經。則廣張律相。宗經者引律。則散漫無歸。觀此論文。足為龜鏡。四中所居業處。即是田宅。田以充口。宅以居身。皆為求安。而生過漏。準諸經律。田宅及下人民。奴婢。畜生。種植。財寶。並是妨道。皆入八不淨中。穀帛。麤金。麻。三種。並收財寶中。出家為道。不許別人。時通僧用。廣有開制。如律所明。五中。初牒釋。此下簡示。

五眾同類。名內眷屬。和合無外。名同意者。此外生過故。不聽畜。何下徵意。人即居常淨人。民謂繫屬官者。如僧祇。畢陵伽在聚落自泥房。王與使人。三反不受。云若能盡壽持五戒奉齋。然後受之。又十誦。王與五百人。守竹林寺等。以其下。釋所以。謂若但言人。恐收不盡。既同流俗。例不畜之。六中難生卑下心者。因畜婢僕。則多憍慢故。七中養生求利者。為出賣故。縱非為利。律亦不開。八多事者。田園種植。事非一故。九積集者。集即是聚。十中二過。不順威儀者。非尊重故。損眾生者。傷物命故。薩婆多論云。掘地壞生。制有三益。一不惱眾生。二止誹謗。三大護佛法。佛若不制。國王大臣役使比丘。由佛制故。王臣息心。不復役使。令靜緣修道。是名大護。

△<sub>辰三</sub>釋喻。

此十種增過事。修行菩薩。宜速遠離。不應親近。避大火聚。相似法故。如經。皆當遠離。如避火坑故。

釋喻中。經文在第十過前。論家從義。故在後結。論文上下。多從義判。不為文局。學者須知。文結十種。或有論本。取下參預世事。為十一種。參預增過為第十一。不然參預等。自屬根本身處。

本又豈得兼前方便戒耶。今依古本以十為定。又束此十總為三種。前三貪求過。中六畜積多事過。後一乖儀過。修行菩薩速遠離者。此所謂摩訶衍方便也。然今經本是化教。論中但云菩薩。則知通被道俗。非局比丘。不可專用律文。橫判持犯。律唯制道。故有犯科。經乃通含。但論業行。多見紊亂。故特點之。

△實三不同外道損智護。

不同外道損智護者。謂世間分別見故。此分別見有五句十種分別。如經合和湯藥。乃至皆所不應故。遮異見故。

次損智護中。世間分別見。謂邪心計校。求利活命。並非出世正智故也。五句即五種見。一中各兼兩別。故離為十。初句湯藥為二。飲汁為湯。丸散為藥。次句占相為二。卜術為占。辨形氣察聲骨為相。用此二法。以知吉凶。第三星宿為二。星即五星六曜。宿即二十八宿。音秀謂觀天象。預識災詳。第四句盈虛為二。推步謂推算日月星辰。行步而知。盈虛之數。第五歷算為二。歷謂陰陽律歷。算謂度物知數。如世算法。斗秤尺寸。井田步畝。不待細數。以術可知。有合為一。而云歷數。有陰陽吉凶為二者非。經文皆所不應一句。通結十過。遮異見者。即上十種分別也。然上所